

Ikadua a Sulat'i Yuhan

Bismillah Sir-Rahman Nir-Raheem

Assalamu Alaikum Warahmatullahi Ta'ala Wabarakatuh

Na su Ikadua a Sulat'i Yuhan na lu pakatumpa kanu isa a lumpukan nu 'bpamaginugut. Ibpamandu sia su kagkakalimua nu uman i isa a lusud kanu lumpukan nu 'bpamaginugut enggu inidtutuma bun su di katalima kanu manga gulu a 'bpamamandu sa di pakatidtu.

2 Yuhan

Su Salam enggu su Palihala

¹Su nia a sulat na ganat sa laki a isa kanu kalukesan nu lumpukan nu 'bpamaginugut. San i nia pakatumpa kanu Babay^a a pinamili nu Kadenan enggu kanu manga wata^b nin. Na sangat a ipegkalimu ku sekanu sia luyud kanu bantang enggu dikena bu saki ka apeg den nu langun nu nakatuntay kanu bantang. ²Ipegkalimu nami sekanu sabap kanu bantang a sia den sa lekitanu taman sa taman.

³Na malalayun sia sa lekitanu su palihala, limu enggu kalilintad a ebpun kanu *Ama tanu a su Kadenan enggu kanu Tunggal'in^c a su Isa al-Masih sia kanu kapaguyag-uyag tanu a luyud kanu bantang enggu kanu kalimu.

Su Kagkakalimua enggu su Kaingat kanu manga Salakaw i Ibpmamandu nin

⁴Na sangat a magalaw aku, ka nailay ku su ped a manga wata nengka a 'bpaguyag-uyag sia luyud kanu bantang a mana su inisugu sa lekitanu nu Ama. ⁵Na kagina ka maitu na 'bpangenin ku sa leka i 'gkakalimua tanu langun. Dikena i nia bagu a kasuguan ka andang den i nia sa lekitanu. ⁶Na pakapailay tanu su kakalimu sia kanu kanggulalan kanu manga kasuguan nu Kadenan. Na su kasuguan a nia a nakineg'u den kanu paganay na su kapaguyag-uyag sia luyud kanu kagkakalimua. ⁷Kagina namakatagayak den sia sa dunia su manga tagakalen a manga taw a dikena 'bpangimbenal sa su Isa al-Masih na mibaluy a manusia. Na su entu ba a manga taw na silan su tagakalen enggu pedsungkang kanu Isa al-Masih. ⁸Na pangingati nu i di madadag su pinggumalayanan tanu ka enggu nu matalima su talutup a balas.

⁹Na apia entain i di mapalalayun kanu panduan nu Isa al-Masih enggu pangumanan nin pan su entu a panduan nu Isa al-Masih na

^a 1:1 Su **Babay** sia a linabit na inukit bu sa bayuk a nia nin maena na *su lumpukan nu 'bpamaginugut kanu Isa al-Masih* a 'gkatumpun nu sulat'i Yuhan.

^b 1:1 **manga wata** Na su nalabit sia a manga wata na nia nin maena na *su manga taw a lusud kanu lumpukan nu 'bpamaginugut* a 'gkatumpun bun nu sulat.

^c 1:3 **Tunggal'in** Nia sabap a kinagelal kanu Isa al-Masih sa Tunggal'u Kadenan na kagina ebpun mismu sekanin kanu Kadenan sia nakanggulalan kanu Suti a Ruh nu Kadenan. Madakel pan i kasabutan tanu makapantag kanu Tunggal'u Kadenan sia kanu *Maena nu Mangadalem a Kadtau kanu Kitab* a mailay kanu kapupusan nu nia a kitab.

2 Yuhan

dikena sekanin lusud kanu Kadenan. Ugaid'a apia entain menem i mapalalayun kanu panduan nu Isa al-Masih na lusud sekanin kanu Ama enggu kanu Tunggal'in. ¹⁰Na amaika aden makauma sa lekanu a salakaw i panduan nin na di nu papedtalusa kanu walay nu enggu di nu bun semalam. ¹¹Kagina u entain i edsakaw-sakaw lun na makaamung sekanin kanu mawag a galebek'in.

Su Mauli a Salam

¹²Madakel pan i pegkiugan ku pedtalusa sa lekanu ugaid'a da ku den idalem sia kagina 'gkapangingalap ku i makasan aku bun sa lekanu asal'a makambibitiala tanu ka enggu matalutup su kagalaw tanu.

¹³Pedsalaman kanu bun nu manga wata nu suled'engka a nia a babay^d a pinamili bun nu Kadenan.

Wassalam

^d 1:13 **manga wata nu suled'engka a babay** Na su nalabit sia a suled'engka a babay na nia nin maena na *su lumpukan ni Yuhan* enggu su nalabit menem sia a manga wata na *su manga taw kanu lumpukan ni Yuhan*.